

Ո Ր Ո Շ ՈՒ Մ N 03/6
/վարչական տույժ նշանակելու մասին/

«10» հունվարի 2019թ.

ք. Վանաձոր

Հայաստանի Հանրապետության պետական եկամուտների կոմիտեի Արևելյան մաքսատուն-վարչության պետ Արմեն Գրիգորյանս, քննելով Արթուր Եսոյանի /անձն. 10AB41899, քաղաքացիություն՝ Վրաստանի Հանրապետության/ կողմից մաքսային կանոնների խախտման վերաբերյալ գործը,

Պ Ա Ր Զ Ե Ց Ի

Վրաստանի քաղաքացի Արթուր Եսոյանի անվամբ 20.10.2018 թվականի թիվ 05100033/201018/0000289570 մաքսային մուտքի օրդերով «Ժամանակավոր ներմուծում» մաքսային ընթացակարգով 30 օր ժամկետով ՀՀ տարածք է ներմուծվել MERCEDES-BENZ E240 մակնիշի, LL680UU պետհամարանիշի, 1999 թվականի արտադրության տրանսպորտային միջոց: Նշված տրանսպորտային միջոցի ժամանակավոր ներմուծման վերջնաժամկետը սահմանվել է մինչև 19.11.2018 թվականը, սակայն մինչ այդ ժամկետի ավարտը վերոնշյալ տրանսպորտային միջոցը չի արտահանվել ՀՀ տարածքից, որի արդյունքում խախտվել է հետադարձ արտահանման պարտավորությունը:

ՀՀ ՊԵԿ Արևելյան մաքսատուն-վարչության Բագրատաշենի մաքսային կետ-բաժնի ավագ մաքսային տեսուչ-իրավաբանի կողմից 21.11.2018 թվականին Արթուր Եսոյանի նկատմամբ կազմվել է մաքսային կանոնների խախտման վերաբերյալ արձանագրություն ՀՀ մաքսային օրենսգրքի 199-րդ հոդվածի 1-ին մասի հատկանիշներով:

Մաքսային կանոնների խախտման վերաբերյալ վարչական վարույթի շրջանակներում հարցում է կատարվել ՀՀ ՊԵԿ Ներքին անվտանգության վարչություն՝ ավտոմեքենայի սահմանահատումների վերաբերյալ տեղեկատվություն ստանալու նպատակով: Պատասխան գրությունից պարզվել է, որ MERCEDES-BENZ E240 մակնիշի, LL680UU պետհամարանիշի, 1999 թվականի արտադրության տրանսպորտային միջոցը 20.10.2018 թվականին Բագրատաշենի մաքսային կետ-բաժնով ներմուծվել է ՀՀ, սակայն հետագա արտահանման պարտավորությունը չի կատարվել:

Նշանակվել է գործի քննություն 21.12.2018 թվականին ժամը 15:00-ին, վերջինս պատշաճ ծանուցվել է:

Արթուր Եսոյան 10.12.2018թ. դիմում է ներկայացրել, որով հայտնում է, որ 20.10.18թ. թիվ 05100033/201018/0000289570 ՄՄՕ-ով ՀՀ տարածք է ներմուծել MERCEDES-BENZ E240 մակնիշի, LL680UU պետհամարանիշի, 1999 թվականի արտադրության տրանսպորտային միջոց: Նշված ավտոմեքենայի մաքսային արժեքը մաքսային մուտքի օրդերում լրացվել է 1923520 դրամ, սակայն մեքենան գնել է 700 ԱՄՆ դոլարին համարժեք դրամով: Միևնույն ժամանակ հայտնել է, որ տեղեկացվել է ՀՀ-ում մեքենայի մաքսային արժեքի մասին, որը 700 ԱՄՆ դոլար չէ: Միևնույն ժամանակ խնդրել է վերոհիշյալ ՄՄՕ-ն չեղարկել և լրացնել նոր ՄՄՕ՝ հիմք ընունելով իր կողմից գնված մեքենայի արժեքը, իսկ անհնարինության դեպքում ՀՀ-ում գործող կողմնորոշիչ գինը:

14.12.2018թ. թիվ 22-2/1882498-18 գրությամբ վարչական մարմինը դիրքորոշում հայտնելու միջնորդությամբ դիմում է վերադաս մաքսային մարմնին ՄՄՕ-ում 7.1 «ապրանքի արժեք» դաշտում ՀՀ հսկիչ կողմնորոշիչ գնից բարձր նշված արժեքի վերաբերյալ:

Գործի քննությունը տեղափոխվում և նշանակվում է 28. 12. 2018թ. ժամը 15:00-ին, որի մասին վերջինս պատշաճ ծանուցվում է:

Ի պատասխան 14.12.2018թ. թիվ 22-2/1882498-18 գրության 27.12.2018թ. թիվ 02/8-1/1901546-18 գրությամբ հանձնարավել է կատարել համապատասխան գործողություն՝ վերանայելով մաքսային արժեքը:

Գործի քննությունը կրկին տեղափոխվում և նշանակվում է 10. 01. 2019թ. ժամը 16:00-ին, որի մասին վերջինս պատշաճ ծանուցվել, սակայն չի ներկայացել գործի քննությանը:

Տրանսպորտային միջոցի մաքսային մուտքի օրդերում «Մաքսային մուտքի օրդերի ձևի և մաքսային մուտքի օրդերը լրացնելու և կիրառելու կարգի մասին» Մաքսային Միության հանձնաժողովի 2010թ. հունիսի 18-ի 288-րդ որոշմամբ հաստատված կարգի «ՄՄՕ-Ն և ՄՄՕԼ-ը լրացնելու և տեղեկությունները փոփոխելու ըդհանուր սկզբունքները» բաժնի 8-րդ կետի համաձայն գրվել է նոր մաքսային մուտքի օրդեր՝ վերագնահատվել է ապրանքի արժեքը:

Տրանսպորտային միջոցի մաքսային արժեքն՝ ըստ վերագնահատված մաքսային մուտքի օրդերի կազմում է 1015896 ՀՀ դրամ, որի «Բաց թողնում՝ ներքին սպառման համար» մաքսային ընթացակարգով հայտարարագրման դեպքում կառաջանան մաքսային վճարներ 528266 ՀՀ դրամի չափով:

ՀՀ մաքսային օրենսգրքի 189-րդ հոդվածի 1-ին մասի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունն, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն:

Նույն հոդվածի 2-րդ մասի համաձայն՝ Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 199-րդ հոդվածի 1-ին մասի համաձայն՝ հետագա արտահանման պարտավորությամբ Հայաստանի Հանրապետություն ներմուծված ապրանքները և տրանսպորտային միջոցները սահմանված ժամկետում չարտահանելը կամ հետագա ներմուծման պարտավորությամբ արտահանված ապրանքները և տրանսպորտային միջոցները սահմանված ժամկետում Հայաստանի Հանրապետություն չներմուծելը՝ առաջացնում է տուգանքի նշանակում՝ խախտման օրվա դրությամբ այդ ապրանքների և տրանսպորտային միջոցների համար «ներմուծում՝ ազատ շրջանառության համար» մաքսային ռեժիմով նախատեսված մաքսային վճարների մեծության 50 տոկոսի չափով, բայց ոչ պակաս, քան 50 հազար դրամ:

«Եվրասիական տնտեսական միության մաքսային օրենսգրքի մասին» պայմանագրի 264-րդ հոդվածի 1-ին կետի համաձայն օտարերկրյա ֆիզիկական անձանց կողմից՝ Միության անդամ չհանդիսացող պետությունում գրանցված անձնական օգտագործման

տրանսպորտային միջոցների ժամանակավոր ներմուծումը Միության մաքսային տարածք թույլատրվում է ոչ ավելի, քան 1 տարի ժամկետով: Նույն հոդվածի 5-րդ մասի 1-ին պարբերության համաձայն՝ ժամանակավոր ներմուծված անձնական օգտագործման տրանսպորտային միջոցները, մինչև այն ժամկետի լրանալը, որի ընթացքում այդ տրանսպորտային միջոցները կարող են ժամանակավոր գտնվել Միության մաքսային տարածքում, Միության մքասային տարածքից արտահանման, ազատ շրջանառության համար բացթողման կամ սույն հոդվածին համապատասխան այլ նպատակներով ենթակա են մաքսային հայտարարագրման:

Այսպիսով վարչական մարմինը քննելով գործում առկա ապացույցները գտնում է, որ Արթուր Եսոյանի արարքում առկա է ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտման հատկանիշներ:

Ելնելով վերոգրյալից և ղեկավարվելով ՀՀ մաքսային օրենսգրքի 221 հոդվածով և Վարչական իրավախախտումների վերաբերյալ ՀՀ օրենսգրքի 214-րդ, 234-րդ հոդվածներով՝

Ո Ր Ո Շ Ե Ց Ի

1. ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտում կատարելու համար՝ Արթուր Եսոյանին ենթարկել վարչական պատասխանատվության՝ տուգանելով 264133 ՀՀ դրամի չափով:
2. Որոշման մասին հայտնել Արթուր Եսոյանին:
3. Պարզաբանել, որ որոշումը ՀՀ մաքսային օրենսգրքի 222-րդ հոդվածի համաձայն 10-օրյա ժամկետում կարող է բողոքարկվել վերադաս մաքսային մարմին կամ ՀՀ վարչական դատավարության օրենսգրքով սահմանված կարգով՝ վարչական դատարան:

Սույն որոշմամբ նշանակված տուգանքի վճարման հաշվեհամարներն են. 900005024055՝ գումարի 70% և 900233586016՝ գումարի 30% (ՀՀ պետական բյուջե, կենտրոնական գանձապետարան, Արեվելյան մաքսատուն-վարչություն, ԿՈՂ 29):

ԱՐԵՎԵԼՅԱՆ ՄԱՔՍԱՏՈՒՆ-
ՎԱՐՉՈՒԹՅԱՆ ՊԵՏ



Ա. ԳՐԻԳՈՐՅԱՆ